

आकाशवाणी

खबरां -----

1. प्रधानमंत्री मोदी 5एं देसें दे अपने दौरे दे चौथे चरण तैहत ब्राजील पुज्जी गेदे न, ओहू अज्ज राती 17में ब्रिक्स शिखर सम्मेलन च शिरकत करडन।
2. भारत ते अर्जेटीना सामरिक सांझ-भ्याली ते होरने कई क्षेत्रें च साथ-सहयोग गी बदाने गितै राजी होई गे न।
3. गृह मंत्री अमित शाह होरें अर्थ बवस्था च सहकारिता दी भूमिका बारै दस्सेआ ते अमूल ते एन.डी.डी.बी परियोजना दा उद्घाटन कीता।
4. सेहत मंत्री जगत प्रकाश नड्डा होरें 1200 थमां बद्द नर्सिंग अमले गी नियुक्ति पत्र बंडे।
5. कैलाश मानसरोवर जात्रिएं दा दुआ जत्था वापसी च नाथुला सवां गंगटोक पुज्जी गेआ ऐ।

<><><><><><>

PM-Brazil

प्रधानमंत्री नरेंद्र मोदी होर अज्ज रातीं ब्राजील दे रियो डी जेनेरियो च शुरू होआ करदे ब्रिक्स शिखर सम्मेलन च हिस्सा लैडन। इस सम्मेलन दा मकसद मेम्बर मुलखें बश्कार साथ-सहयोग च बाद्दा करना ऐ। 17में ब्रिक्स शिखर सम्मेलन च कुल संसारी शासन सुधारें, जलवायु परिवर्तन सरबन्धी चुनौतियें, आर्टिफिशल इंटेलीजेंस ते होरनें मुद्दे पर चर्चा होग। सम्मेलन दा मकसद सेहत, कुल संसारी समस्याएं दे नबेड़े लेई आर्टिफिशल इंटेलीजेंस दे नैतिक इस्तेमाल, जलवायु परिवर्तन दी चुनौतियें कन्नै निब्वडने लेई माली जरूरतें गी पूरा करने लेई बैंक बवस्था च सुधार करना ते संतुलन आहले ते समावेशी कुल

संसारी शासन गी बढ़ावा देना ऐ। प्रधानमंत्री होर सम्मेलन दौरान कई लीडरें कन्नै दक्खी मीटिंगां करडन।

<><><><><><>

PM-Argenteena

प्रधानमंत्री नरेंद्र मोदी होरें अर्जेटीना दे राष्ट्रपति जेवियर मिलेई हुंदे कन्नै इक्क महत्वपूर्ण बैठक कीती। 57 बरें च कुसा भारती प्रधानमंत्री आसेआ अर्जेटीना दा एहू पैहला दौरा हा। दौनें लीडरें दक्खी बैठक मगरा डेलीगेशन स्तरै दी बैठक दौरान कई पहलुएं बारै गल्लबात कीती। दौनें लीडर कारोबार, तकनीक, सुरक्षा, अंतरिक्ष, सेहत ते दवाइएं-औषधिएं आहले खेत्तरें दे अलावा होरनें कई खेत्तरें च साथ-सहयोग गी बदाने पर सहमति होई गे न। आकाशवाणी सवां स्हाढे संवाददाता नै खबर दिती ऐ जे दौनें मुखें च कई मौकें गी दिखदे होई प्रधानमंत्री मोदी होरें India-MERCOSUR कारोबारी समझौते गी अगगे बदाने च अर्जेटीना दे समर्थन दी विनती कीती। खरी गुणवत्ता ते दवाइएं दी महत्ता बारै गल्ल करदे होई भारत नै भारती फार्मा कंपनिएं दी अर्जेटीना च प्रवेश गी सखल्ला बनाने दा आह्वान कीता। परते च अर्जेटीना नै USFDA या Europe EMA थमां मान्यता प्राप्त भारती दवाइएं गी आयात करने दी खुल्ल देने दी गल्ल आक्खी। राष्ट्रपति जेवियर होरें भारत दे यू.पी.आई सरिस्ते च रूचि दस्सी जेदे पर दौनें मुख्य माली नीति च एहदी भूमिका दा अध्ययन करने लेई केंद्री बैंक दा दौरा कराने पर राजी होई गेन। प्रधानमंत्री मोदी होरें पहलगाम आतंकी हमले खिलाफ भारत दा समर्थन करने पर अर्जेटीना दा धन्नवाद कीता। श्री मोदी होरें महात्मा गांधी ते रविंद्रनाथ टैगोर दी मूर्तिएं पर पुष्पांजलि अर्पित कीती जेदे मगरा ओहू 17में ब्रिक्स सम्मेलन च हिस्सा लैने लेई ब्राजील गितै रवाना होई गे।

<><><><><><>

Rajnath Singh Controllers Conference

रक्षा मंत्री राजनाथ सिंह होर कल नमी दिल्ली च नियंत्रक सम्मेलन 2025 दा उद्घाटन करडन। रखा खातें सरबन्धी मैहकमे आसेआ इस त्रै रोजा सम्मेलन दा आयोजन कीता जा करदा ऐ। रक्षा मंत्रालय नै इक बयान च आखेआ ऐ जे इस प्रोग्राम च 8 उच्च सतरी कारोबारी इजलास लोआए जाडन जेदे च बजट ते खातें च सुधार, अंदरूनी लेखा परीक्षण सरिस्ते गी नमे सिरेआ तैयार करना, शोध च साथ-सहयोग, कीमतें गी तय करने मुतल्लक नवाचार ते समर्थ निर्माण सरबन्धी क्षेत्र शामिल न। आखेआ गेआ ऐ जे एह इजलास मुकाबलेबाजी ते आत्मनिर्भर रक्षा उद्योग लेई रणनीतिक समर्थन दे कन्नै राजकोषीय विवेक च संतुलन बनाई रखने च उकीकृत माली सलाहकार दी उभरा करदी भूमिका दा पता लाडन। इस सम्मेलन च रक्षा खातें सरबन्धी मैहकमे दे नुमाइंदे, सिविल अधिकारी, शिक्षाविद, विचारक ते रक्षा ते वित्त क्षेत्र सवां बक्ख-बक्ख धड़े शामिल होडन।

<><><><><><>

Sham-Kashmir

केंद्री गृह ते सहकारिता मंत्री अमित शाह होरें अज्ज आखेआ ऐ जे डॉ. श्यामा प्रसाद मुखर्जी होरें राश्ट्री अखंडता लेई अपना जीवन कुर्बान करी दित्ता ते उन्दे बिजन कश्मीर भारत दा इक अनव्रुट हिस्सा नेई होई सकदा। शाह होर गुजरात दे आनंद च डॉ. श्यामा प्रसाद मुखर्जी होरें'गी उंदी जयंती दे मौके पर उनेंगी श्रद्धांजलि देआ करदे हे। शाह होरें सहकारिता मंत्रालय दे चार ब'रे पूरे होने पर अमूल ते एन.डी.डी.बी दे बक्ख-बक्ख विकास कम्में दा उद्घाटन कीता। एहदे कोला पैहले केंद्री मंत्री होरें आखेआ जे सहकारिता सोसायटियों दा मुल्खै दे आर्थिक विकास च बड़ा महत्वै आहला योगदान ऐ। उनें आखेआ जे दो लक्ख नमे PAC, सहकारिता विश्वविद्यालय, अन्नदाने दी बिक्री ते उत्पादन सरबन्धी 3 सहकारी सोसायटियों ते डेयरी कन्नै सरबन्धी 3 सोसायटियों कन्नै मुल्खै दे सहकारी अंदोलन होर तगड़ा होग।



LG-Mookerjee

लेफ्टिनेंट गवर्नर मनोज सिन्हा होर अज्ज डॉक्टर श्यामा प्रसाद मुखर्जी हुंदी 125मीं जयंती दे मौके पर श्रीनगर दे टैगोर हाल च लग्गे दे इक प्रोग्राम च शामिल होए। डॉ. श्यामा प्रसाद मुखर्जी होरें'गी श्रद्धांजलि भेंट करदे होई लेफ्टिनेंट गवर्नर होरें आधुनिक भारत दे इक्क वास्तुकार दे तौर पर उंदे योगदान गी चेत्ता कीता। लेफ्टिनेंट गवर्नर होरें जम्मू-कश्मीर दे उज्जवल भविक्ख लेई 'इक राश्ट्र-इक संविधान' दी वकालत करने, राश्ट्री एकता दी मजबूती लेई उंदी भूमिका ते डॉ. श्यामा प्रसाद मुखर्जी हुंदे जीवन ते विरासत दे सम्मान च 2 बरें दे इक अभियान दी शुरूआत करने बारै जानकारी दित्ती। उपराज्यपाल होरें आखेआ जे डॉ. मुखर्जी होरें जम्मू-कश्मीर दा भारत च एकीकरण करने लेई अपने जीवन दा बलिदान देई दित्ता। उनें आखेआ जे प्रधानमंत्री नरेंद्र मोदी होरें मुखर्जी हुंदी शहादत दे 66एं बरें मगरा उंदा सुखना पूरा कीता।



Handicraft-GST

केंद्री बपार ते उद्योग मंत्री पीयूष गोयल होरें जम्मू-कश्मीर च हथकरघा ते हथखड्डियें सरबंधी उत्पादें गी बढ़ावा देने च मदाद करने लेई माल ते सेवा टैक्स च कमी करने दी सफारिश करने दा वादा कीता ऐ। केंद्री मंत्री होरें श्रीनगर च एफ.टी.आई.आई बपार सम्मेलन च भाशण दिंदे होई आखेआ जे हथकरघा ते हथखड्डियें पर लग्गे दे जीएसटी बारै द'ऊं-द'ऊं डैलीगेशनें मिगी जानकारी दित्ती ऐ। उनें आखेआ जे इस सरबंधै च मिगी ते खजाना मंत्रालय गी दरखास्त सौंपी ऐ ते अस एहू पता ला करदे आं जे केह राहत मुहैया कराई जाई सकदी ऐ ते इनें चीजें पर जीएसटी दी दर 12 गी फीसदी कोला 5 फीसदी कीता जा। उनें एब्बी आखेआ जे जम्मू-कश्मीर च तौले गै पैकेजिंग ते डजैन सरबंधी इक्क उत्कृष्ट केंद्र खोलेआ जाग।

<><><><><><>

J.P Nadda

केंद्री सेहत मंत्री जे.पी नड्डा होरें दिल्ली दी मुख्मन्त्री रेखा गुप्ता हुंदे कन्नै राश्ट्री राजधानी दिल्ली च 1200 सवां बद्द नर्सिंग अमले गी नियुक्ति पत्र सौंपे। इस मौके पर बोलदे होई श्री नड्डा होरें आखेआ जे मुल्लखै दा सेहत सरिस्ता हून समग्र बनी गेआ ऐ जेदा उद्देश्य छड़ा इलाज करना गै नेई, सगुआं पुणर्वास करना बी ऐ। श्री नड्डा होरें आखेआ जे पिछले बरे च 1 ज्हार 750 करोड़ रपे दित्ते जाने दे बावजूद दिल्ली दी पिछली सरकार नै प्रधानमंत्री आयुष्मान भारत सेहत योजना तैहत इक पैसा बी खर्च करने च नाकाम रेई। उनें भरोसा जताया जे मौजूदा सरकार दित्ते गेदे पैसे दी मिसाल अगले बरे मार्च च समाप्त होने परैंत कामयाबी कन्नै इस्तेमाल करदे होई 1100 आरोग्य मंदर समर्पित करोग। उनें आखेआ जे इनें पैसैं कन्नै बने दे आरोग्य मंदर दिल्ली च सेहत मूल ढांचे गी बणावा देंगन ते मुफ्त इलाज करंगन। इस मौके पर सेहत मंत्री जे.पी. नड्डा ते मुख्मन्त्री रेखा गुप्ता होरें आयुष्मान भारत पंजीकरण वैन गी झंडी दस्सियै रवाना कीता।

<><><><><><>

Kailaish-Mansarovar

कैलाश मानसरोवर जात्रिएं दा दुआ जत्था अपनी जात्तरा पूरी करियै वापस गंगटोक पुज्जी गेआ ऐ। 47एं जात्रिएं दे इस जत्थे नै पिछले म्हीने दी 25 तरीकै गी नाथुला बन्ने गी पार करियै अपनी पवित्र जात्तरा शुरू कीती ही। जात्रिएं सुचारू ते उचित बवस्था गितै सिक्किम सरकार दा धन्नवाद कीता ते सराहना कीती। ऐतिहासिक मानसरोवर जात्तरा पिछले म्हीने दी 20 तरीक गी शुरू होई ही जेल्लै सिक्किम दे गवर्नर ओम प्रकाश माथुर होरें 36 जात्रिएं दे पैहले जत्थे गी नाथुला सवां रवाना कीता हा।

<><><><><><>

Yatra-Batch

7 ज्हार 208एं शिवभक्तें दा 5मां जत्था अज्ज बडलै श्री अमरनाथ आधर शिविर भगवती नगर जम्मू थमां कश्मीर घाटी लेई रवाना होआ। एह् श्रद्धालु 307 गड्डिएं दे काफले च रवाना होए। इस इच 5

ज्हार 258 मर्द, 1 ज्हार 587 महिलां, 30 बच्चे, 277 साधु ते 56 साधवियां शामिल हियां। इंदे चा 3 ज्हार 199 श्रद्धालु बालटाल आहले आधार शिविर ते 4 ज्हार 9 पहलगाम आहले आधार शिविर ताई रवाना होए जित्थुआं ओहू श्री अमरनाथ जी दी पवित्र गुफा लेई रवाना होइना।

<><><><><><>

Pilgrims Vande Bharat

हाल च शुरू होई दी अमरनाथ जात्तरा लेई श्रद्धालु ते सैलानी श्रीनगर ते कटड़ा थमां वंदे भारत एक्सप्रेस रेल सेवा दा लाहू ठोआ'रदे न। बड़ी मती रफ्तार कन्नै चलने आहली इस भलेआं अज्जै-कल्लै आहली रेलै नै इस पवित्र जात्तरा गी नमें आयाम दित्ते न। श्रद्धालुएं नां छड़ा आरामदायक, सुरक्षित ते घटोघट्ट समें च सफर कीता, सगुआं जम्मू-कश्मीर दे कुदरती शलैपे गी बी उनें बड़े कौलै थमां दिक्खेआ। जात्रुएं हासल करवाई जा'रदिएं स्थूलतें ते इन्ने आरामदायक ते सैहल रेलै दे झूटे पर बड़ा संदोख बुज्जेआ। उनें अपने इस सफर गी रोमांचकारी ते यादगार दस्सेआ। केइएं श्रद्धालुएं आखेआ जे वंदे भारत एक्सप्रेस कन्नै उंदी जात्तरा होर सखल्ली होई गेई ऐ।

<><><><><><>

Muharram

मुखै दे बक्ख-बक्ख हिस्सें च आशूरा-ए-मुहर्रम पूरे मजहबी अकीदत ते श्रद्धाभाव कन्नै मनाई जा'रदी ऐ। पैगम्बर मोहम्मद हुंदे पोत्रे हजरत ईमाम हुसैन होरें अपने साथिएं कन्नै करबला च सच्चाई धर्म ते न्याऽ दे सिद्धांतें दी खातर अपनिएं जिंदें दा बलिदान दित्ता हा। प्रधानमंत्री नरेंद्र मोदी होरें अपनी इक सोशल मीडिया पोस्ट च हजरत ईमाम हुसैन हुंदे बलिदान गी चेत्ता करदे होई आखेआ जे उनें धर्म दा साथ देइयै लोकें गी मुश्कल हालात च बी सच्चाई कन्नै खड़ोने दी प्रेरणा दित्ती। जम्मू-कश्मीर दे लेफ्टिनेंट गवर्नर मनोज सिन्हा होर श्रीनगर च यौम-ए-आसूरा दे मौके पर पारम्परिक जुलजनाह जलूस च शिया लोकें कन्नै मौजूद रे। एहू जलूस बोटाकदल दे अली पोरा इलाके थमां डाउनटाउन

श्रीनगर दे जादीबल इलाके तगर चलोआ। इस दौरान सुरक्षा दे पुख्ता प्रबंध कीते गेदे हे। लेफ्टिनेंट गवर्नर होरें जलूस च शामिल सोग करा रदे शिया समुदाय दे लोकें गी पान पलेयाआ। एहदे शा पैहलें उनें जुल्लिनाह गी रस्मी तरीके नै पारम्परिक चादरै च लपेटेआ। जुल्लिनाह सांकेतिक रूप कन्नै ईमाम हुसैन हुंदे घोड़े गी दर्शांदा ऐ।

<><><><><><>

Baba-Sindh Gorla

बाबा सिद्ध गोरिया जी हुंदा मेला अज्ज साम्बा जिले दे रामगढ़ इलाके च धार्मिक श्रद्धा ते उत्साह कन्नै शुरू होई गेआ ऐ। उत्तर भारत दा एह मशहूर ते बरे च इक्क बारी लगने आहला मेला ऐ। श्रद्धालुएं अज्ज बड्डलै पवित्र तला च चलोबी लाई ते बाबा जी हुंदी स्माद्धि पर मत्था टेकेआ। मुल्खै दे बक्ख-बक्ख हिस्सें सवां श्रद्धालु अपने परिवार कन्नै इत्थै बाबा जी हुंदा शीरवाद लैने गी औंदे न।

<><><><><><>